

Фермерлер қолдаусыз қалмайды
3-бет

Азаттық рухының алтын бесігі
6-бет

Өткенін іздеп келді
8-бет



ОРТАЛЫҚ ҚАЗАҚСТАН

ҚАЗДАУЫСТЫ ҚАЗЫБЕК БИ: СӨЗДІҢ АТАСЫ – БІРЛІК, АНАСЫ – ШЫНДЫҚ
ҚАРАФАНДЫ ОБЛЫСТЫҚ ҚОФАМДЫҚ-САЯСИ ГАЗЕТИ

1931 жылдың 4 қазанынан бастап шығады

www.ortalyq.kz www.instagram.com/ortalyq.kz

БЕЙСЕНБІ, 12 ҚАЗАН, 2023 ЖЫЛ №114 (23 290)

www.facebook.com/ortalyq.kz info@ortalyq.kz

МЕЗГІЛ МӘСЕЛЕСІ

Делдал қалта қакса, ауыл қалтырайды


Биыл өткен жылдарға қарағанда көмір сататын орындарда дүрбелең жоқ. Ол арнайы орындарды белгілеп, қысқы отын мөлшерін жеткілікті көлемде әзірлегеннен болып отыр. Бұл – биліктің ұтқаны. Бірақ, ұтылған тұсы – «Көмірге мұқтаж, біз апарғанымызды бәрібір алатын ел бар» деп халықтың қалтасын қакқан делдалдардың алақанын ысқылауы. Алыпсатар байып, халық алақан жаймасын десек, не істеуге болады?

«Шұбаркөл көмір» басшылығы не дейді?

Қазіргі күні «Шұбаркөл көмір» АҚ дәурені жүріп тұр. Халықтың назары да, алары да осы көмір. Алайда, оларға деген елдің айтары көп. Өйткені, «қара алтын» қымбат. Шалғай ауылдарға жеткенше, баға мың құбылады. «Неге бұлай?» деген сұрақты кенішке жолдадық.

– 2023 жылы биржалық сауда-саттық қорытындысы бойынша коммуналдық-тұрмыстық көмірді көтерме сатып алушы болып, «Көмір гарант» ЖШС анықталды. Биыл біз тұтынушылар үшін алып кету пунктін ашқан жоқпыз, «Көмір гарант» ЖШС-мен келесі елді мекендердің отын базаларында көмір сату туралы шешім қабылдады. Ол – Жезқазған қаласы (Ұлытау облысы), Жаңаарқа кенті (Ұлытау облысы), Осакаровка кенті (Қарағанды облысы), Арқалық қаласы, Аманқарағай станциясы, Қостанай қаласы (Қостанай облысы).

► 4-бет



БӘРЕКЕЛДІ!

Азаматымыз жарады!

Алматыдағы Ұлттық кітапхана республикалық «Үздік жас кітапханашы – 2023» байқауын өткізген еді. Сол байқауда Шет аудандық кітапханашының қызметкері Азамат Нұрахметов бірінші орын алып, Алатаудың етегінде Арқаның мерейін үстем етті.

Ерік НАРЫН,
«Ortalyq Qazaqstan»

Байқау нәтижесі бойынша бас жүлдені Алматы облысының кітапханашысы алды. Бірінші орын Азаматтың қанжығасында. Екінші орынды Талдықорған мен Түркістан облысының үміткерлері бөлісті. Үшінші орыннан Қызылорда мен Батыс Қазақстан және Ақмола облысының мамандары көрінді.

Байқаудың барлық қатысушыларына сертификаттар табысталып, жеңімпаздар дипломдармен және бағалы сыйлықтармен марапатталды.

– Дайындыққа 1 ай кетті. Қыркүйекте еңбек демалысым еді. Осы байқауға қатысу үшін еңбек демалысымды құрбан еттім. Бұл байқаудан мол тәжірибе алдым, – деді Азамат Нұрахметов.

Шет ауданы

ӘЛЕУМЕТ

Еңбектің ақысы өтелуі тиіс

Дерекке сүйенсек, ел бойынша 827 кәсіпорын өзінің жұмыскерлеріне 5,9 млрд. теңге берешек. Бұл жайлы Еңбек және халықты әлеуметтік қорғау министрлігі мәлімдеп отыр.



Жансая ОМАРБЕК,
«Ortalyq Qazaqstan»

Мемлекеттік еңбек инспекторлары 20,6 мың жұмыскердің жалақы бойынша алашағы бар екенін анықтады. Берешек кәсіпорындардың басшыларына орындалуы міндетті 1 127 нұсқама беріліп, 134,9 млн. теңгеден астам сомаға айыппұл салынды.

Жалақы бойынша берешекті өтеудің

қатаң кестелері мен мерзімдерін белгілеу нәтижесінде 18 мыңнан астам жұмыскердің құқығы қорғалды. Оларға 5,2 млрд. теңге төленді.

Облыстың еңбек инспекциясы жөніндегі басқармасына өткен 9 айда барлығы 2 791 өтініш түсіпті. Оның 2 093-і еңбек-ақысын уақытылы төлемеуге қатысты. Өтініштер негізінде тексерістер жүргізіліп, 1 780 жұмыскердің 577,2 млн. теңге берешегі өтелді.

ДЕНСАУЛЫҚ

Обырдың жолы кесіледі

Елімізде онкологиялық ауруларға қарсы күрес жөніндегі кешенді жоспар қабылданды. Жоспар биылдан бастап 2027 жылға дейінгі кезеңді қамтиды. Кешенді жоспар республикалық бюджет комиссиясының отырысында қаралды. Оның нәтижелері бойынша 460,7 млрд. теңге сомасында қаржыландыру жолда тапты.

Жансая ОМАРБЕК,
«Ortalyq Qazaqstan»

Денсаулық сақтау министрлігінде айтылғандай, кешенді жоспар халықаралық сарапшылар мен менеджерлердің, сала мамандарының, оқытушы-профессорлық құрам мен үкіметтік емес ұйымдар өкілдерінің қатысуымен әзірленді.

Оның аясында қауіп факторларының профилактикасы, тиімділігі жоғары ерте диагностика, мамандандырылған емдеуді дамыту, паллиативтік көмек және оңалту, кадрлық әлеуетті және ғылымды дамыту

бағыттары жүзеге асырылмқ. Компьютерлік, магниттік-резонанстық, позитрондық-эмиссиялық томографияны, радионуклеотидтік зерттеулерді пайдалана отырып, заманауи сәулелік диагностика аппаратында зерттеп-қарау мүмкіндігін арттыру, телемедицина, жасанды интеллект мүмкіндіктерін белсенді енгізу көзделген.

Елде онкологиялық көмекті жетілдіру – маңызды міндеттердің бірі. Жыл сайын 40 мыңға жуық қазақстандыққа кәтерлі ісік анықталып, 13 мың науқас қайтыс болады. Бүгінде 205 мыңнан астам адам есепте тұр.

РЕПОРТАЖ

Қырда қайнаған еңбек

Қырда қып-қызыл науқан. Күзгі жиын-терім жұмыстары қауырт жүріп жатыр. Алқаптағы егін орағы, жайылымдағы шөпті жинау аяқталуға жақын. Ауылдағы ағайынның алаң көңілі де орнына түсе бастады. Біраз шаруаның беті қайтып. Дәл осы жемшөп жиналып жатқан мезетте астықты өңір – Нұра ауданына жол түсті.

Ертеректе егінімен аты тағылған Нұра өңірі – Қазақстанның нағыз астықты белдеуі. Дәл іргесінде елдің ордасы Астана, келесі беткейінде кеншілердің астанасы Қарағанды бар. Сол себепті жемшөбі де, астығы да, мал еті де өтімді. Нұрадағы шаруашылықтардың шалқып, дәулеті тасуы – осыдан.



Г.Прокоп комбайн жүргізушілерімен

Қасымхан БҮРКІТҮЛЫ,
«Ortalyq Qazaqstan»

Өрісінде отар-отар қой өріп...

Сонымен, Нұра кентінен тоқсан шақырымдай ұзап, Изендіге келдік. Мұнда ақтылы қой өргізген, Арқада асыл тұқымды Қарғалы қой тұқымын сақтап қалған ірі «Отқанжар» атты шаруашылық бар. Шаруашылықты алғаш аяғынан тік тұрғызған Қанат Отарбаев өзінің ұлы Аслан Отарбаевқа жақында шаруа қожалығының мөріні табыстапты. Бізді сол Аслан Қанатұлы қарсы алды.

«Отқанжар» қотанында 11 мың қой жусап, 120 ауыл тұрғыны еңбек етіп, напақа тауып отыр. Бір отар тоқтыны шопан Жакия Шопабаяв күндіз өрістен аранға қамап жатыр екен. Дөп түсіпсіз. Қойдың жайын шопаннан артық кім жақсы білсін?!

Жакия – шаруашылықтағы үздік шопан. Көктемде бір отар жас тоқтыны қабылдап алады. Санын кемітпей, салмағын өсіріп, қысқа аман-есен жеткізу – осы еңбеккердің мойнында. Шаруашылық басшылары шопанға әбден сенім артқан.

– Жакия ағамыз ертеден осы малдың соңында. Малдың бар бабын беске біледі. Кеңес кезінде де шопан болған. Бұл кісіге өткізген тоқтыларымыз қара күзде қойдай болып шыға келеді. Басқа шопандарға да ақыл-кеңес айтып, білгенімен бөлісіп отырады, – дейді Аслан Отарбаев.

– «Мал өсірсен, қой өсір, өнімі оның көл-көсір» деп, тегін айтпаған болар балаларымыз. Ғұмырымыз осы аттың үстінде өтті. Көз ашқалы бері қой өсіріп, өрісімізді толтырып келеміз. Өлі де атпен бағамын. Қазір көбіне мотоциклмен бағады ғой. Қойды олай бағу – қате. Қой асықпай баппен жайылса ғана, еті майлы, семіз бола-

ды. Осы шаруашылықта еңбек етіп келе жатқанымызға көп уақыт болды. Еңбектің арқасында жаман болған жоқпыз, тәубе. Балаларды қанаттандырдық, – дейді шопанның өзі.

Рас, қой шаруашылығының тағдыры дәл қазір таразыға тартылып тұр. Көп шаруашылық қой жүні керексіз қалғандықтан, осы мәселеге тап болып отыр.

Қарғалы қойының жүні Кеңес Одағы кезінде жеңіл өнеркәсіптің кәдесіне кәдімгідей жараған-ды. Ал қазір Алматыдан, Тараздан келіп, арзан бағаға (келісі 140 теңге) алады. Амалы жоқ шаруашылық өткізеді. Қыркымға кеткен ақшаны да ақтамайтын көрінеді.

Отарбаевтар ұсынып отырған Қарғалы қойының тиімділігі сонда, бұл тұқым – етті әрі жүнді. Бірақ, екі жыл болды, сауда жоғын айтады шаруа басшылығы.

► 5-бет

